

В ТУЮЖДЕ НЕДЕЛЮ СЫРНУЮ ВЕЧЕРА,

По Начальном Псалме: На Господи Возвах Поставим Стихов И От Изведи Из Темницы: И Поем Стихиры 4 Покаянны, Октоиха На Ряду Гласа, Яже Суть Писаны Две Вечер На Стиховне, И Две Утренних Стиховных: [Такожде И В Прочия Недели, От Сея Даже До Пятыя Святаго Поста. Господи Возвах: Поем На Глас Иже Во Осмогласнике На Ряду] И В Триоди 3, И В Минеи 3.

Творение господина иосифа.

Стихиры, глас 2. Подобен: егда от древа:

Воздержанием тело смирити вси потщимся, * божественное преходяще поприще непорочнаго поста * и молитвами и слезами господа * спасающаго нас възыщем, * и забвение злобы всеконечное сотворим, вопиюще: * согрешихом ти, спаси, * якоже древле ниневитяны христе царю, * и общники ны сотвори * небеснаго царствия благоутробне.

Себе отчаяваю, помышляя дела моя господи, * всякаго мучения достойная: * се бо презрев честныя твоя спасе заповеди, * блудно мое житие иждих. * темже молюся, тучами покаяния мя очистив, * постом и молением * яко един милостивый просвети, * и не гнушайся мене * благодетелю всех, и преблагий.

Ин господина феодора, глас тойже.

Подобен: Паче ума даров:

Постное время светло начнем, * к подвигом духовным себе подложивше, * очистим душу, очистим плоть, * постимся якоже в снадех от всякия страсти, * добродетельми наслаждающесе духа: * в нихже совершающесе любовию, * да сподобимся вси видети всечестную страсть * христа бога и святую пасху, * духовно радующесе.

Таже в минеи святому, подобны 3. Аще ли иматъ самогласен:

Слава, аще ли несть, Слава, и ныне, богородичен, в тойже глас минеи.

Вход с кадильницею: Свете тихий:

Прокимен глас 8: Не отврати лица твоего от отрока твоего, яко скорблю, скоро услыши мя: * вонми души моей, и избави ю.

Стих: Спасение твое боже да примет мя.

Стих: Да узрят нищии, и возвеселятся.

Стих: Възыщите бога, и жива будет душа ваша.

И паки высочайшим гласом: Не отврати лица твоего от отрока твоего, яко скорблю, скоро услыши мя

И паки: Вонми души моей, и избави ю.

Подобает ведати, яко во всех неделях святыя четыредесятницы во светильничное бывает вход, ради великих прокименов.

Сподоби господи: Поклоны 3: и ектения.

На стиховне самогласен глас 4:

Возсия благодать твоя господи, * возсия просвещение душ наших. * се время благоприятное, * се время покаяния, * отложим дела тьмы, * и облечемся во оружия света: * яко да преплывше поста великую пучину, * в тридневное воскресение достигнем, * господи и спаса нашего иисуса христа, * спасающего души наша.

Стих: К Тебе возведох очи моя, Живущему на Небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Возсия благодать твоя господи, * возсия просвещение душ наших. * се время благоприятное, * се время покаяния, * отложим дела тьмы, * и облечемся во оружия света: * яко да преплывше поста великую пучину, * в тридневное воскресение достигнем, * господи и спаса нашего иисуса христа, * спасающего души наша.

Таже стих: Помилуй нас, Господи, помилуй нас, яко по многу исполнихомся уничижения: * наипаче наполнися душа наша поношения гобзующих, и уничижения гордых.

И мученичен: Прославляемый * в памятьх святых твоих * христе боже, * от них умоляемь, * низпосли нам велию милость.

Слава, самогласен в минеи, аще имать:

И ныне, богородичен по гласу минеи.

Аще ли не имать, Слава, и ныне, богородичен, глас тойже.

Подобен: Яко добля:

Ангельстии чини тя богомати прославляют: * бога бо всечистая родила еси, * отцу, и духа соприисносущна, * и ангельская воинства * от не сущаго хотением поставивша. * егоже моли от тли спасти и просветити * души православных, * ты воспевающих всечистая.

Ныне отпуцаеши: **Трисвятное: поклоны три. Пресвятая троице: Отче наш:**

И настояция тропари, глас 4:

Богородице дево радуйся: И творим поклон един.

Слава:

Крестителю Христов, * всех нас помяни, * да избавимся от беззаконий наших: * тебе бо дадеся благодать * молитися за ны.: **И творим поклон един.**

И ныне:

Молите за ны святии Апостоли, * святии вси, * да избавимся от бед и скорбей: * вас бо теплыя предстатели * ко Спасу стяжахом. **И творим поклон един.**

Таже: Под Твое благоутробие прибегаем Богородице, * моления наша не презри во обстоянии: * но от бед избави ны, * Едина Чистая, * Едина Благословенная. **Без поклона.**

Господи помилуй, 40 кротким и тихим гласом.

Слава, и ныне: Честнейшую херувим:

Именем господним благослови отче.

Священник: Сый благословен христос бог наш всегда, ныне и присно и во веки веков.

Мы же: Аминь.

И молитву: Небесный Царю, * веру утверди, * языки укроти, * мир умири, * святой храм сей добре сохрани, * прежде отшедшия отцы и братию нашу * в селениях праведных учини, * и нас в покаянии и исповедании приими, * яко Благий и Человеколюбец.

И творим три поклоны великия, и глаголем молитву преподонаго ефрема сирина:

Господи и владыко живота моего, дух праздности уныния, любоначала, и празднословия не даждь ми.

Дух же целомудрия, смиренумудрия, терпения, и любве, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

И целуем святых и честных иконы.

И глаголет предстоятель: Слава тебе христе боже, упование наше, слава тебе.

И бывает молитва от священника, и совершенный отпуст.

По вечерни же в трапезе бывает утешение братии.

По востании же от трапезы, повечерие поем малое по обычаю, с метаниями и поклоны постными. На Слава в вышних, метания 3. [Аще было бдение, канон богородице не глаголется.] Достойно есть:

Трисвятое. метания 3, и обычные тропари.

Господи помилуй, 40.

Иже на всякое время:

Иерей: Боже ущедрит ны:

Поклоны 3 великия, с молитвою святого ефрема:

господи и владыко: И прочих 2_и.

Таже, Трисвятое. По отче наш: господи помилуй, 12_

и молитва: Нескверная:

И даждь нам:

И отпуст.

И имже образом указася служба вечерни и повечерия сея недели, сие да бывает и в прочия, даже до пятыя недели святых четьредесятницы, изменяемым некоим, о нихже на своих им местех будет.

Подобает ведати, яко аще будет брату нашему отити ко господу во святых сих днех посреде седмицы: не бывают третины его, даже до пятка вечера, тогда бо совершается паннихида его: подобне и в субботу литургия его. Во грядущую же

субботу бывают девятины его, аще случится, аще ли ни. Четыредесятины же его
бывают, егда число дней его исполнится: приношения же, и памяти его
начинаются от новья недели, даже до исполнения дней четыредесяти.

НАЧАЛО СВЯТАГО И ВЕЛИКАГО ПОСТА.

В ПОНЕДЕЛЬНИК ПЕРВЫЯ СЕДМИЦЫ.

Знаменает параккласиарх к свету, коснее ради вечерняго утешения, и собираем ся вси по обычаю в церковь. Поем полунощницу без поклонов, токмо в конец три поклоны великия, с молитвою, Господи и Владыко: Сие же бывает в 1-й день токмо. В прочия же дни святаго и великаго поста, поем полунощницу всю с поклоны 16, по обычаю. Таже встав иерей творит обычное метание настоятелю, и входит во святой олтарь, и прием кадильницу, станет пред святою трапезою, и кадя крестообразно, возгласит: **Благословен Бог наш: И нам отвечающим: Аминь**, исходит иерей и кадит. А уставленный псалмопевец глаголет: **Трисвятое**, всегда кроме метаний. По Отче наш, возглашает иерей: **Яко Твое есть Царство: и по аминь, Господи помилуй, 12. Приидите поклонимся: трижды, без метаний. И псалом 19 и 20, по конце их, Трисвятое, без метаний. По Отче наш: Тропари обычные. Сим глаголемым, кадит иерей святой олтарь, и всю церковь. Таже, ектенія: Помилуй нас Боже: Таже, О великом господине и отце нашем святейшем патриархе: Возглас: Яко милостив и человеколюбец: Чтец: Аминь. И глаголет: Именем Господним благослови отче. И абие иерей: Слава Святей, и Единосущней: И прочая. Брат же, егоже есть день, став на уреченном месте, глаголет шестопсалмие со всяким вниманием, не борзяся, но со страхом Божиим, яко к Самому Богу беседующе невидимо.**

И не имать кто власти шепты творити, ниже плюнути, или хракнути: но паче внимати от псаломника глаголемым, руже имуще согбены к персем, главы же преклонены, и очи имуще долу, сердечныма очима зряще к востоком, да молим ся о гресех наших, поминающе смерть, и будущую муку, и жизнь вечную.

В начало же 102-го псалма, глаголет иерей утренния молитвы. По скончании же псалмов, Слава, и ныне, Аллилуиа, трижды. Таже, ектенія великая, и возглас. Поет же учиненный монах Аллилуиа, во глас прилучившагося в Октоихе гласа.

Стих 1: От нощи утренюет дух мой к Тебе Боже, зане свет повеления Твоя.

Стих 2: Правде научитесь живущии на земли.

Стих 3: Зависть примет люди ненаказанныя.

Стих 4: Приложи им зла Господи, приложи зла славным земли.

И по коемждо стихе, Аллилуиа, трижды. Таже Троичны гласа. Поем же со умилением велегласно и косно с пением. На 2-м стихе, Слава: а на третьем, И ныне:

Таже стихословим едину кафисму Псалтира. По антифоне же, на Аллилуиа творим поклоны три, вси равно, последующе игумену, или еккласиарху. По первой кафисме седальны умилительныя Осмогласника.

Таже чтение во святом Ефреме, зане от того дне начинается святой Ефрем, и чтется до пятка Цветоносныя недели.

По 2-м стихословии седален Троици господина Иосифа. Глас 2.

Подобен: Милосердия сущи:

Поста Божественным начатком умиление стяжим, * от души вопиюще: * Владыко Христе, молитву нашу прими, * яко избранное кадило, и избави нас, * молимся, злосмрадныя тли, * и муки страшныя, * яко един сый благоуветливый.

Слава, тойже.

И ныне, Богородичен. Подобен:

Милосердия сущи источник, * милости сподоби нас Богородице, * призри на люди согрешившия, * яви яко присно силу Твою: * на Тя бо уповающе, * радуйся вопием Ти, * якоже иногда Гавриил безплотных архистратиг.

И паки чтение во святем Ефреме.

По 3-м стихословии седален господина Феодора. Глас 2.

Подобен: Пречистому Твоему образу:

Всечестное воздержание начнем светло, * лучами сияюще святых заповедей Христа Бога нашего, * любви светлостию, * молитвы блистанием, * чистоты очищением, * благомужества крепостию: * яко да светоносни предварим во святое и тридневное Воскресение, * осиявающее нетление миру.

Слава, тойже.

И ныне, Богородичен. Подобен:

Необоримую молитву Твою стяжав в лютых, * свободжаюся от оскорбляющих мя паче надежды чудно. * О Мати Божия, * предворяеши всегда просящим Тя верно. * Отонудуже благодарно вопием Ти: * прими Владычице, * краткая благодарственная, * вместо сих буди ми во всех помощь.

Таже чтение в Лавсаице. Псалом 50. И обычная молитва: Спаси Боже люди Твоя: Таже возглас: Посем начинаем: Господеви поем: на глас канона Минеи, дне святаго. И глаголют стихи песней скоро, кийждо лик свой стих: дондеже достигнут до, Огустеша: и от того начинают стих держати на 14. И поем Минеи со ирмосом на 6, поем же сице: Первый лик глаголет стих: Огустеша: и поет ирмос. Второй же лик глаголет 2 стих: Рече враг: И по нем тропарь канона. И порядку стихи по ликом до, Тогда потщашася: от стиха же Тогда потщашася, начинаем трипеснец господина Иосифа, на 4. На Господь же царствуй: поем другой трипеснец господина Феодора Студита: и поет 1-й лик тропарь. 2-й же лик 2 стих, и тропарь. Посем соединившимся двум ликом, поют, Слава, Троичен, вышшим гласом: И ныне, Богородичен. Таже глаголем высочайшим гласом: Слава Тебе Боже наш, слава Тебе. И поем иный тропарь господина Феодора. Понеже бо по пяти тропарей имать песнь. Последи же глаголем катавасию, ирмос втораго канона.

Сице поется осмая и девятая песни.

Третию же песнь поем сице:

Глаголет первый лик стих: Господь взыде на небеса: и тропарь канона Минеи. Второй лик стих: И даст крепость царю: И второй тропарь канона Минеи. Таже, Слава, и ныне, с тропари канона. И поет первый лик ирмос Минеи третия песни, последи канона.

Сим образом поем и 6-ю песнь.

Четвертую же, и пятую, и седмую песни сице поем:

Глаголи первее ирмос канона Минеи, таже конечныя два стиха песни поем к тропарем канона: и Слава, и ныне, ирмосом же не покрываем песни: зане ирмос глаголется прежде песни. Поются же ирмосы Минеи по каноне, токмо по третьей и шестой песнях: занеже у тех песней первее ирмос не поется. В прочия же дни седмицы кроме понедельника, тако поется и 1-я песнь, якоже указася о 4-й, и 5-й, песнях. А в нихже песнях будет трипеснец, поется последи канона катавасия, ирмос трипеснца, якоже вышше изъясися.

Ведомо же буди: яко Осмогласник не поется во всю святую 40-цу, кроме Недель. Поется же точно Минея, и трипеснец. А в нихже песнях несть трипеснца, поется токмо Минея. По 3-й песни глаголет иерей ектению малую. Таже седален святаго единожды. Слава, и ныне, Богородичен: И чтение в Лавсаице. По 6-й песни ектения малая. Таже седален мученичен: аще же имать святой кондак, глаголем его zde: мученичен же глаголем по 1-й кафисме с седалями, с припевом: Дивен Бог во святых своих: И чтение в Синаксаре.

Канон и трипеснец господина Иосифа. Глас 2:

Песнь 1:

Ирмос: Грядите людие, * поим песнь Христу Богу, * раздельшему море, * и наставльшему люди, * яже изведе из работы Египетския, * яко прославися.

Зде стихословится первая песнь.

Како ныне моего восплачу отпадения? кое начало сотворю спасения моего, блудно поживый, Щедре? Имиже судьбами веси, спаси мя.

Се время покаяния, се день спасительный, пощения вход: душе бодрствуй, и страстей входы затвори, ко Господу взираючи.

Грехов треволение бурящееся, во глубину низвлачит мя отчаяния: но к Твоей прибегаю пучине милости, спаси мя Господи.

Един аз греху поработихся, един аз страstem двери отверзох, благоуветливе Слове, обрати мя Спасе благоутробием Твоим.

Богородичен: Источник безстрастия рождающая, уязвлена страстьми Отроковице исцели, и огня вечнаго исхити мя, едина Богоблагодатная.

Иный трипеснец господина Феодора, глас и ирмос тойже:

Грядите людие, днесь восприимем пощений дарование, яко Богодарованное время покаяния, в сем Спаса умилостивим.

Приспе ныне, введется подвигов время, поста поприще, усердно вси начнем сей, добродетели Господеви яко дары носяще.

Слава, Троицен: Единице простая, трисветлая, начальственнейшая Едина, всемогнейшая, всежизненная, Боже и Господи, Отче вседержителю, Сыне и Душе, спасай чтущия Тя.

Богородичен: Божию святую гору воспоим, Марию нескверную, из Неяже возсия правды Солнце, сущим во тьме Христос, всех Жизнь.

Слава Тебе Боже наш, слава Тебе.

Колесница огненная прият Илию чуднаго, постом вооруженнаго, Моисея показа зрителя неизреченных: и мы сей приимше, узрим Христа.

Слава Тебе Боже наш, слава Тебе.

Брашно Адам яде, и от рая того невоздержание изрину: нас же, Господи пост приемый, достойны покаяния покажи Человеколюбче.

Катавасия: Грядите людие, * поим песнь Христу Богу, * раздельшему море, и наставльшему люди, * яже изведе из работы Египетския, * яко прославися.

По 6-й песни мученичен гласа.

Песнь 8:

Ирмос: В пещь огненную ...,

Огнесожжена сластьми, и души зрительным помрачена, огнем Твоего страха обновив Христе, светом мя спасения озари, да Тя славлю во вся веки.

Сытость возненавидевши страстей, напитайся добрых сладостною пищею, и усладися паче от поста сладостию, горести сластей уклоняющихся, смиренная душе моя, и поживи во веки.

Ослеплен душею, и пьянством страстей отемнен, никакоже взираю к Тебе Единому Богу. Темже мя ущедри и просвети, и покаяния отверзи ми врата.

Богородичен: Онебесившая наше земное и тленное Чистая, существо, теплою Твоею молитвою, управитися нашим мольбам и молениям сотвори, к Твоему и всех Богу и Царю.

Иный.

Ирмос: Древле оросившаго еврейския отроки в пламени, * и опалившаго Господа халдеи преславно в нем, * воспоем, глаголюще: * благословите, и превозносите Его во веки.

Светло усящим поста вход вернии, и да не сетуим: но омыим лица наша безстрастия водою, благословяще и превозносяще Христа во веки.

Елеем помазавше милости души главу, не многословим Отцу нашему, Сущему на Небесех, молитвы возсылающе, благословяще и превозносяще Его во вся веки.

Благословим Отца, и Сына, и Святаго Духа, Господа.

Присносущна, безначальна Отца, воспоем вернии, Сына же собезначальна, и Духа сопросиявша из Отца, единосущна Лица, Единого суща всесильного начала и власти.

Богородичен: Мати Богозванная, очистилище воистинну верных, из Тебе бо оставление подается всем богато: Сына Твоего и Господа не престай молящи о поющих Тя.

Слава Тебе Боже наш, слава Тебе.

Постився Господь четырехдесятную меру дней, сия ныне освяти и очисти дни, братие, в няже достигше, зовем: благословите, и превозносите Христа во веки.

Хвалим, благословим, поклоняемся Господеву:

Катавасия: Древле оросившаго еврейския отроки в пламени, * и опалившаго Господа халдеи преславно в нем, * воспоем, глаголюще: * благословите, и превозносите Его во веки.

И стихословится Честнейшую:

Песнь 9: От Бога Бога Слова:

Поста день, отложение греха да будет ти душе, и к Богу мание вкупе, и присвоение: яко да убежиши злобныя пропасти, и самыя токмо пути возлюбиши, ведущия ко оному покою.

И помышленьми поползнувся, и плотию прегрешив рыдаю, и стеню, и воию: спаси мя Господи, спаси мя незлобиве едине, и не осуди мене во огонь геенны оныя, осуждения достойнаго.

Во светлую поста облекшеся ризу, пиянства темныя и злотяжкия совлечемся одежды, и светли бывше Божественными добродетельми, светозарная Спасова верою узрим страдания.

Богородичен: **И**знемогшую всеми прилоги злобных бесов, страстную мою душу исцели Пречистая Владычице, целителя рождающая Христа, избавление нас, ведущих Тя Отроковицу, Деву нетленну.

Иный:

Ирмос: **Преестественно плотию заченшую во чреве, * от Отца безлетно предвозсиявшее Слово, * в песнях немолчных величаем вернии.**

Ныне наста время святых постов, начнем сего в добрых пребываниих: в судах бо и крамолах не поститесь глаголет.

В горе Хорив постом очищесь, виде Бога Илия: очистим и мы постом сердце, и узрим Христа.

Слава, Троицен: **Е**диному Естеству поклоняюся, три Лица пою, Единаго Бога всех, Отца, и Сына, и Святаго Духа, присносущное начало.

Богородичен: **Ч**истая Отроча раждаещи, Дева млеко доиши: како в сию двою девствуещи рождаши? Бог есть содеявый, не взыскуй от Мене, еже како?

Слава Тебе Боже наш, слава Тебе.

День един убо, рече, житие всяко земных: труждающимся от любве четыредесять суть дней поста, яже совершим светло.

Катавасия: **Преестественно плотию заченшую во чреве, * от Отца безлетно предвозсиявшее Слово, * в песнях немолчных величаем вернии.**

Таже, Достойно есть: Поклон един.

Ектения: Паки, и паки: И светилен Троицен гласа.

На Всякое дыхание стихов не поем, но стихологисуем: Хвалите Господа с Небес: обычные псалмы, 3. И аще прилучится в Минеи на ряду два святых: Поем единому вечер стихиры, а другому на Хвалитех стихиры на 4, аще будут. Аще же ни, глаголет учиненный брат:

Тебе слава подобает Господи Боже наш, и Тебе славу возсылаем, Отцу, и Сыну, и Святому Духу, ныне и присно, и во веки веков, аминь.

Слава Тебе, показавшему нам свет.

Слава в вышних Богу: И прочая. И творим метания 3, равно на местех наших стояще.

Посем иерей: Исполним утреннюю: И возглас.

И совокупльшеся оба лика вкупе, поем:

На стиховне самогласен, глас 5:

Прииде пост, мати целомудрия, * обличитель грехов, * проповедник покаяния, * жительство ангелов, * и спасение человеков, * вернии возопиим: * Боже, помилуй нас.

Стих: Исполнимомся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Прииде пост, мати целомудрия, * обличитель грехов, * проповедник покаяния, * жительство ангелов, * и спасение человеков, * вернии возопиим: * Боже, помилуй нас.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.

И мученичен: Благословено воинство Царя Небеснаго, аще бо и земнороднии быша стратотерпцы, но ангельский сан потщашася достигнути, о телесех небрегше, и страстьми своими безплотных чести сподобишася: молитвами их, Господи спаси души наша.

Слава, и ныне, Богородичен: Тя Божию Матерь, Деву Чистую и херувим святейшую, во гласех песней величаем: зане душею и телом Богородицу исповедуем, яко воистинну рождшую Бога воплощенна: молися Пречистая о душах наших.

Таже, Благо есть исповедатися Господеви, и пети имени Твоему, Вышнии, возвещати завтра милость Твою, и истину Твою на всяку ночь.

Трисвятое. И Отче наш:

И тропарь:

В церкви стояще славы Твоя, на Небеси стояти мнимся, Богородице дверь Небесная, отверзи нам двери милости Твоя.

Господи помилуй, 40.

Слава, и ныне: Честнейшую херувим:

Именем Господним благослови отче.

Иерей: Сый благословен Христос Бог наш, всегда ныне и присно, и во веки веков, аминь.

И молитву: Небесный Царю, * веру утверди, * языки укроти, * мир умири, * святыи храм сей добре сохрани, * прежде отшедшии отцы и братию нашу * в селениих праведных учини, * и нас в покаянии и исповедании приими, * яко Благий и Человеколюбец.

И творим три поклоны великия, и глаголем

молитву преподонаго ефрема сирина:

Господи и владыко живота моего, дух праздности уныния, любоначалаия, и празднословия не даждь ми.

Дух же целомудрия, смиренномудрия, терпения, и любве, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

Малые Поклоны: 12.

Паки скончавше поклоны, глаголем молитву вышеписанную Господи и Владыко живота моего: и поклон един великий.

ПЕРВЫЙ ЧАС

И по еже востати нам, начинает предстоятель: Приидите поклонимся: трижды, и метания три. И совокупаем первый час. И скончану третьему псалму, глаголем Аллилуиа, и метания три.

Подобает ведати: яко во вся понедельники святых Четырдесятницы на 1-м часе кафисмы не стихословим. В прочия же дни, стихословим кафисму, и творим на коемждо антифоне метания три.

Такожде и в пяток, первый час и девятый, без кафисмы.

Поет же учиненный чтец, или иерей, среди церкви тропарь, на глас 6:

Заутра услыши глас мой, * Царю мой и Боже мой.

И мы поем велегласно тожде, и творим коленоприклонение на землю. Такожде и на прочия два стиха.

Стих 1: Глаголы моя внуши Господи, разумей звание мое.

Стих 2: Яко к Тебе помолюся Господи.

И паки: Заутра услыши глас мой, * Царю мой и Боже мой.

Слава, и ныне: Что Тя наречем, о Благодатная; Небо, яко возсияла еси Солнце правды: рай, яко прозябла еси Цвет нетления: Дева, яко пребыла еси Нетленна: Чистую Матерь, яко имела еси на святых своих объятиях Сына, всех Бога. Того моли спастися душам нашим. И метания 3.

Таже: Стопы моя направи по словеси Твоему, и да не обладает мною всякое беззаконие. Избави мя от клеветы человеческия, и сохранию заповеди Твоя. Лице Твое просвети на раба Твоего, и научи мя оправданием Твоим. И метания 3

Да исполнятся уста моя хваления Твоего, Господи, яко да воспую славу Твою, весь день великолепие Твое.

Трисвятое. И метания три. Пресвятая Троице: Отче наш: Возглашает священник: Яко Твое есть Царство:

И по аминь глаголем тропарь. В понедельник убо, и во вторник, и четверток, глаголи Богородичен:

Преславную Божию Матерь, и святых Ангел Святейшую, немолчно воспоем сердцем и усты, Богородицу Сию исповедающе, яко воистинну Рождшую Бога Воплощенна, и молящуся непрестанно о душах наших.

В среду же и пяток глаголем сие:

Скоро предвари, прежде даже не поработимся врагом хулящим Тя, и претящим нам, Христе Боже наш, погуби Крестом Твоим борющия нас, да уразумеют, како может православных вера, молитвами Богородицы, Едине Человеколюбче.

Господи, помилуй, 40.

И глаголем молитву:

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

Господи помилуй, **трижды.**

Слава, и ныне, Честнейшую херувим: И поклон един. Именем Господним благослови отче.

Священник: Боже, ущедрни ны, и благослови ны, просвети лице Твое на ны, и помилуй ны. И творим поклоны, якоже предписася: и потом глаголет предстоятель, или чтец: Трисвятое, и метания три. Отче наш: Господи помилуй, 40. И молитва:

Христе, Свете Истинный, Просвещающий и Освящающий всякаго человека, грядущаго в мир, да знаменается на нас свет лица Твоего, да в нем узрим Свет Неприступный: и исправи стопы наша к деланию заповедей Твоих, молитвами Пречистыя Твоея Матере, и всех Твоих святых, аминь.

Слава, и ныне: Господи, помилуй, трижды. Господи, благослови.

Таже исходим, литию творяще в притворе.

И тамо глаголются обычныя молитвы: и чтутся оглашения преподобнаго отца нашего Феодора Студита от предстоятеля, или от еклисиарха, яко преписася, сиречь, в среду и пяток.

И бывает конец, и отпуст.

Сей образ бывает во святую Четыредесятницу на Утрени, и на первом часе. По отпущении же исходяще из церкви, идем со всяким безмолвием в келлии своя, или на службу: и не подобает нам беседы творити друг со другом на монастыре в пути, удержано бо бысть сие от святых отец.

ТРЕТИЙ ЧАС

Ударяет кандиловжигатель в било довольно: И собираемся в церковь, творяще прежде начала пения кийждо нас пред святыми дверьми поклоны 3 и целуем святяя иконы. И на оба лика по единому малу поклону. Благословившу же священнику, И начинающим нам: Царю Небесный: Трисвятое. И метания 3. По Отче наш: **перей: Яко Твое есть Царство: И по аминь, Господи помилуй, 12.** Приидите поклонимся: **трижды и метания 3.** И стихословится третий час, якоже обычай.

В конце же третияго псалма, на Аллилуиа метания три. И стихословим кафисму рядовую: на коемждо же антифоне творим метания три. И по кафисме чтец, или перей, став среди церкви:

И глаголет тропарь, глас 6:

Господи, Иже Пресвятаго Твоего Духа * в третий час Апостолом Твоим Низпославый: * Того, Благий, не отыми от нас, * но обнови нас, молящих Ти ся.

И нам противоглашающим, творим коленоприклонение до земли. Такожде и на прочия два стиха.

Стих 1: Сердце чисто созижди во мне Боже, и дух прав обнови во утробе моей.

Стих 2: Не отвержи мене от лица Твоего, и Духа Твоего Святаго не отыми от мене.

Слава, и ныне, Богородице, Ты еси Лоза Истинная, * Возрастившая нам Плод Живота, * Тебе молимся, молися Владычице, * со святыми Апостолы, помиловати души наша. и метания три.

И абие чтем в Лествичнике. Начинает же от ныне учиненный монах возбуждати братию, во всю святую 40-цу: обходит же тихо, и призирает на спящих, и возставяет к слышанию, по последовавшему образу. По чтении же,

Господь Бог благословен, благословен Господь день дне, поспешит нам Бог спасений наших, Бог наш, Бог спасти.

Трисвятое. и метания три. И по Отче наш: **Возглашает священник: Яко Твое есть Царство:**

И по аминь поем тропари на глас 8:

Благословен еси Христе Боже наш, * Иже премудры ловцы Явлей, * низпослав им Духа Святаго, * и теми Уловлей вселенную, * Человеколюбче, слава Тебе.

Слава: Скорое и известное даждь утешение рабом Твоим, Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниих, но присно нас предвари, приближися нам, приближися везде Сый, якоже со Апостолы Твоими всегда еси, сице и Тебе желающым соедини Себе, Щедре, да совокуплени Тебе поем и славословим Всесвятаго Духа Твоего.

И ныне: Надежда, и Предстательство, и Прибежище Христиан, Необоримая Стено, изнемогающим Пристанище Небурное, Ты еси Богородице Пречистая: но яко мир спасающая непрестанною Твоею молитвою, помяни нас, Дево Всепетая.

Господи помилуй, 40. И молитва,

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагодарне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум непреступныя Твоя славы, яко благословен еси во веки веков, аминь.

Господи помилуй, трижды. Слава, и ныне: Честнейшую херувим: Именем Господним благослови отче: И священник: Боже ущебри ны: Творим поклоны, якоже предписа, глаголет предстоятель молитву: Владыко Боже Отче Вседержителю: Кандиловжигатель же сотворив обычный поклон предстоятелю, отходит и ударяет в било шесть крат. И по исполнении молитвы,

ШЕСТЫЙ ЧАС

Приидите поклонимся: трижды. И метания три. И стихословим шестый час. И по конце, Слава, и ныне, Аллилуиа, трижды. и метания три. И стихословим кафисму, и по коемждо антифоне, Аллилуиа трижды: и метания 3.

По стихословии же тропарь, глас 2:

Иже в шестый день же и час, * на кресте Пригвождей * в рай дерзновенный Адамов грех, * и согрешений наших рукописание раздери, Христе Боже, * и спаси нас.

Стих 1: Внуши Боже молитву мою, и не презри моления моего.

Стих 2: Аз к Богу возвах, и Господь услыша мя.

К сим же стихом припеваем: Иже в шестый день: весь до конца, и покланяемся по единожды.

Слава, и ныне, Богородичен: Яко не имамы дерзновения за премногия грехи наша, Ты Иже от Тебе Рождагося моли, Богородице Дево: много бо может моление Матернее ко благосердию Владыки: не презри грешных мольбы, Всечистая, яко Милостив есть и спасти Могий, Иже и страдати о нас изволивый. И метания три.

Таже поем тропарь пророчества, глас 5:

Господи Господи, * Егоже вся ужасаются и трепещут от лица силы Твоея, * Тебе припадаем безсмертне, * Тебе молимся Святей: * спаси души наша, молитвами святых Твоих.

Слава, и ныне: и повторяем тойжде.

Прокимен, глас 4, псалом 1: Весть Господь путь праведных, * и путь нечестивых погибнет.

Стих: Блажен муж, иже не иде на совет нечестивых, и на пути грешных не ста.

Пророчества Исаиина чтение. [Глава 1, ст. 1 – 20.]

Видение, еже виде Исаиа сын Амосов, еже виде на Иудею, и на Иерусалим, в царство Озии и Иофама, и Ахаза и Езекии, иже царствоваша во Иудеи. Слыши небо, и внуши земле, яко Господь возглагола: сыны родих и возвысих, тии же отвергошася Мене. Позна вол стяжавшаго и, и осел ясли господина своего: Израиль же Мене не позна, и людие Мои не разумеша. Увы язык грешный, людие исполнени грехов, семя лукавое сынове беззаконнии, остависте Господа, и разгневасте Святаго Израилева: отвратистесь вспять. Что еще уязвляетея, прилагающе беззаконие? Всякая глава в болезнь, и всякое сердце в печаль. От ног даже до главы несть в нем целости: ни струп, ни язва, ни рана палящаяся: несть пластыря приложити, ниже елеа, ниже обязания. Земля ваша пуста, гради ваши огнем пожжени, страну вашу пред вами чуждии поядают, и опусте низвращена от людей чуждих. Оставится дщерь Сионя, яко куща в винограде, и яко овощное хранилище в вертограде, яко град воюемый: аще не бы Господь Саваоф оставил нам семене, яко Содома убо были быхом, и яко Гоморру уподобилися быхом. Услышите слово Господне, князи Содомстии: внемлите закону Божию, людие Гоморрстии. Что ми множество жертв ваших? Глаголет Господь, исполнен есмь

всесожжений овних и тука агнцов, и крове юнцов и козлов не хочу. Ниже приходите явитися Ми: кто бо изыска сия из рук ваших? ходити по двору Моему не приложите. И аще принесете Ми семидал, всеу: кадило, мерзость Ми есть. Новомесячий ваших, и суббот, и дне великаго не потерплю: поста, и праздности, и новомесячий ваших, и праздников ваших ненавидит душа Моя: бысте ми в сытость, ктому не стерплю грехов ваших. егда прострете руки [ваша] ко Мне, отвращу очи Мои от вас: и аще умножите моление, не услышу вас: руки бо ваша исполнены крове. Измыйтеся, [и] чисти будите, отымите лукавства от душ ваших пред очима Моима, престаните от лукавств ваших. Научитесь добро творити, възмите суда, избавите обидимаго, судите сиру, и оправдите вдовицу. И приидите, и истяжимся, глаголет Господь. И аще будут греси ваши яко багряное, яко снег убелю: аще же будут яко червленое, яко волну убелю. И аще хотите, и послушаете Мене, благая земли снете: Аще же не хотите, ниже послушаете Мене, мечь вы пояст: уста бо Господня глаголаша сия.

Прокимен, глас 7. псалом 2: Работайте Господеви со страхом, и радуйтесь Ему с трепетом.

Стих: Вскую шаташася языцы, и людие поучишася тщетным?

И бывает чтение в Лествичнике. Таже тропарь:

Скоро да предварят ны щедроты Твоя, Господи, яко обнищавом зело: помози нам, Боже Спасе наш, славы ради Имене Твоего, Господи, избави нас, и очисти грехи наша, Имене ради Твоего.

Трисвятое. И метания 3. По Отче наш: иерей, возглас: Яко Твое есть Царство:

И тропари на глас 2:

Спасение соделал еси посреде земли, Христе Боже, * на Кресте Пречистей Руце Твои простерл еси, * собирая вся языки, зовущия: * Господи, слава Тебе.

Слава: Пречистому Образу Твоему покланяемся, Благий, * просяще прощения прегрешений наших, Христе Боже: * волею бо благоволил еси плотию възйти на Крест, * да избавиши, яже создал еси, от работы вражия. * Тем благодарственно вопием Ти: * радости исполнил еси вся, Спасе наш, Пришедый спасти мир.

И ныне: Милосердия сущи Источник, * милости сподоби нас, Богородице, * призри на люди согрешившыя, * яви яко присно силу Твою: * на Тя бо уповающе, радуйся, вопием Ти, * якоже иногда Гавриил, * безплотных Архистратиг.

Сей глаголется в понедельник, во вторник и в четверток, подчиненный же глаголется в среду и пяток вместо: Милосердия сущи: Глас 2.

Крестобогородичен: Препрославлена еси, Богородице Дево, поем Тя: * Крестом бо Сына Твоего низложися ад, * и смерть умертвися, умерщвлении востахом, * и живота сподобихомся, рай восприяхом, древнее наслаждение. * Тем благодаряще, славословим, яко Державнаго Христа Бога нашего, * и Единого Многомилостиваго.

Господи помилуй, 40.

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагодутроне,

Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи приими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

Господи помилуй, трижды. Слава, и ныне: Честнейшую херувим: Именем Господним благослови отче.

Иерей: Боже, ущебри ны и благослови ны:

И творим поклоны, якоже обычай. И по исполнении поклонов начинает предстоятель конечное Трисвятое, и метания три. По Отче наш: Господи помилуй, 12.

Таже иерей: Слава Тебе Христе Боже, упование наше, слава Тебе.

И бывает отпуст.

Сей образ и чин должен быти во всю святую Четыредесятницу, на 3-м и на 6-м часе.

ДЕВЯТЫЙ ЧАС

А идеже расхода не бывает, по молитве: Боже и Господи сил: абие глаголем: Приидите поклонимся: трижды, и 9-й час. А идеже бывает расход, о часе 9-м бьет кандиловжигатель девятищи, и собираемся в церковь. И благословившу перерю, начинаем Трисвятое, и метания три.

По Отче наш: Возглашает священник: **Яко твое есть Царство:**

И по аминь, Господи помилуй, 12. Приидите поклонимся: трижды, и метания три, и поем час девятый трипсалмный. В конец же третияго псалма, на Аллилуиа, метания три. И начинаем стихословие кафисмы: На всякий же антифон метания три.

По исполнении же стихословия тропарь, глас 8:

Иже в девятый час нас ради плотию смерть вкусивый, умертви плоти наша мудрование, Христе Боже, и спаси нас.

Стих 1: Да приблизится молитва моя пред Тя, Господи, по словеси Твоему вразуми мя.

Стих 2: Да внидет прошение мое пред Тя, Господи, по словеси Твоему избави мя.

И творяще поклоны в сих.

Слава, и ныне: Иже нас ради Рождейся от Девы, и распятие претерпев, Благий, Испровергий смертию смерть, и воскресение Явлей, яко Бог, не презри, яже создал еси рукою Твоею, яви человеколюбие Твое, Милостиве, приими Рождшую Тя Богородицу, молящуюся за ны, и спаси, Спасе наш, люди отчаянные. **метания три.**

И бывает чтение паки в Лествичнике. И по чтении глаголем стих:

Не предаждь нас до конца, Имене Твоего ради, и не разори завета Твоего, и не отстави милости Твоя от нас, Авраама ради возлюбленного от Тебе, и за Исаака, раба Твоего, и Израиля святаго Твоего.

Трисвятое, и метания три. Пресвятая Троице: Отче наш:

И возглашает священник: **Яко Твое есть Царство:**

И по аминь глаголем тропари, глас 8:

Видя разбойник Начальника жизни на кресте висяща, глаголаше: аще не бы Бог был Воплощься, Иже с нами Распныйся, не бы солнце лучы своя потаило: ниже бы земля трепещущи тряслася, но вся терпий, помяни мя, Господи, во Царствии Твоем.

Слава: Посреде двою разбойнику, мерило праведное обретесе крест Твой: овому убо низводиму во ад тяготою хуления, другому же легчащуся от прегрешений к познанию Богословия. Христе Боже, слава Тебе.

И ныне: Агнца, и Пастыря, и Спаса міра, на кресте зрящи Рождшая Тя, глаголаше слезящи: мір убо радуется приемля избавление, утроба же моя горит, зрящи Твое распятие, еже за всех терпиши, Сыне и Боже мой.

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне,

Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи приими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаемы, и наставляемы, достигнем в соединение веры, и в разум неприступныя Твоея славы, яко благословен еси во веки веков, аминь.

Господи помилуй, **трижды. Слава, и ныне: Честнейшую херувим: Именем Господним благослови отче.**

Священник: Боже ущедрн ны:

И творим поклоны великия три, глаголюще в себе и предъявленную молитву преподобнаго Ефрема: прочих же 12 не творим. И глаголем молитву: Владыко Господи Иисусе Христе Боже наш:

И абие начинает лик, емуже прилучится начинати, на глас 8:

Во Царствии Твоем, помяни нас, * Господи, егда приидеши во Царствии Твоем.

Блажени нищии духом, * яко тех есть Царство Небесное.

Блажени плачущии, * яко тии утешатся.

Блажени кротцыи, * яко тии наследят землю.

Блажени алчущии и жаждущии правды, * яко тии насытятся.

Блажени милостивии, * яко тии помиловани будут.

Блажени чистии сердцем, * яко тии Бога узрят.

Блажени миротворцы, * яко тии сынове Божии нарекутся.

Блажени изгнани правды ради, * яко тех есть Царство Небесное.

Блажени есте, егда поносят вам, и изженут, * и рекут всяк зол глагол на вы, лжуще мене ради.

Радуйтеся и веселитесь, * яко мзда ваша многа на Небесех.

Слава, и ныне:

Помяни нас, Господи, * егда приидеши во Царствии Своем.

Помяни нас, Владыко, * егда приидеши во Царствии Своем.

Помяни нас, Святой, * егда приидеши во Царствии Своем.

Лик Небесный поет Тя и глаголет: * Свят, Свят, Свят Господь Саваоф, * исполнь Небо и земля славы Твоея.

Стих: Приступите к Нему и просветитесь, и лица Ваша не постыдятся.

Лик Небесный:

Слава: Лик Святых Ангел и Архангел * со всеми Небесными силами поет Тя и глаголет: * Свят, Свят, Свят Господь Саваоф, * исполнь Небо и земля славы Твоея.

И ныне: Верую во Единого Бога Отца, Вседержителя, Творца небу и земли, видимым же всем и невидимым. И во Единого Господа Иисуса Христа, Сына Божия Единороднаго, Иже от Отца Рожденнаго прежде всех век; Света от Света, Бога Истинна от Бога Истинна, рожденна, несотворенна, единосущна Отцу, Имже вся быша. Нас ради человек и нашего ради спасения спешдшаго с небес и

воплотившагося от Духа Свята и Марии Девы и вочеловечшася. Распятого же за ны при Понтийстем Пилате, и страдавша и погребенна. И воскресшаго в третий день по Писанием, и возшедшаго на небеса и седяща одесную Отца. И паки грядущаго со славою судити живым и мертвым, Егоже Царствию не будет конца. **И** в Духа Святаго, Господа, Животворящаго, Иже от Отца исходящаго, Иже со Отцем и Сыном Споклоняема и Сславима, Глаголавшего пророки. **Во** едину Святую Соборную и Апостольскую Церковь. Исповедую едино крещение во оставление грехов. Чаю воскресения мертвых, и жизни будущаго века. Аминь.

Ослаби, остави, прости Боже, прегрешения наша, вольная, и невольная, яже в слове и в деле, яже в ведении и не в ведении, яже во дни и в нощи, яже во уме и помышлении, вся нам прости, яко Благ и Человеколюбец.

Отче наш: Таже кондак дне и храма. Аще ли храм Христов глаголем прежде храма, таже дне и святаго рядоваго, егоже есть день, иже имать. Слава: Со святыми упокой Христе: И ныне, храма Богородицы, или: Предстательство христиан непостыдное: Господи помилуй, 40. Слава, и ныне: Честнейшую херувим: Именем Господним благослови отче.

И глаголет священник: Боже ущедри ны:

**И творим три поклоны великия, и глаголем
молитву преподонаго ефрема сирина:**

Господи и владыко живота моего, дух праздности уныния, любоначала, и празднословия не даждь ми.

Дух же целомудрия, смиренумудрия, терпения, и любве, даруй ми рабу твоему.

Ей господи царю, даруй ми зрети моя прегрешения, и не осудати брата моего, яко благословен еси во веки веков, аминь.

Малие Поклоны: 12.

Паки скончавше поклоны, глаголем молитву вышеписанную Господи и Владыко живота моего: и поклон един великий.

Параекклисиарх же поклон сотворив настоятелю, и благословение взем, идет и звонит. **Таже** начинает предстоятель: Приидите поклонимся: трижды, и метания 3. **И** чтец глаголет псалом: **Благослови** душе моя Господа: тихим и кротким гласом. **Иерей** же глаголет обычныя молитвы вечерния пред святыми враты. По псалме, **Слава, и ныне, Аллилуиа, трижды, и поклоны 3. И ектенна великая. И стихословим кафисму: Ко** Господу внегда скорбети ми: и по коемждо антифоне, **Слава, и ныне, Аллилуиа, трижды. и метания три.**